

18 AUG 2002  
Mahathir-Inggeris/I  
KABINET KAJI CADANGAN BALAS

KUALA LUMPUR, 18 Ogos (Bernama) -- Datuk Seri Dr Mahathir Mohamad berkata kabinet akan mengkaji beberapa cadangan balas mengenai langkah supaya bahasa Inggeris digunakan untuk mengajar mata pelajaran Sains dan Matematik.

"Kita akan kaji semuanya," kata Perdana Menteri kepada pemberita selepas menyaksikan Kejohanan Bot Laju F1 Dunia di tasik The Mines Resort City di sini hari ini.

Ketika ditanya bilakah kajian itu akan dilakukan, Dr Mahathir berkata :  
"Saya belum pasti lagi, tetapi kita akan kaji."

Beliau diminta mengulas beberapa cadangan balas termasuk daripada komponen parti Barisan Nasional berhubung langkah kerajaan itu yang akan dilaksanakan mulai tahun depan.

Semalam, Parti Gerakan mengumumkan ia tidak setuju dengan Inggeris digunakan untuk mengajar Sains dan Matematik di sekolah rendah kebangsaan Cina. Parti itu sebaliknya mengesyorkan supaya istilah Inggeris bagi kedua-dua mata pelajaran itu diperkenalkan dalam buku-buku teks untuk pelajar Tahun Empat dan dwi bahasa digunakan pelajar Tahun Lima dan Tahun Enam.

Ketua Pemuda Umno, Datuk Hishammuddin Tun Hussein pula berkata pergerakan itu tidak membantah mana-mana pihak mengulas isu itu selagi ia tidak membabitkan agama, kaum dan mengapi-apikan semangat.

"Pemuda Umno sendiri pada peringkat awalnya bimbang daripada segi pelaksanaan, daripada segi tenaga pengajar, sama ada mencukupi atau tidak dan jadual yang telah ditetapkan untuk pelaksanaannya, dan ini telah kita bincangkan dengan pihak pendidikan," katanya ketika ditemui di tempat yang sama.

Hishammuddin, yang juga Menteri Belia dan Sukan, meminta semua pihak khususnya pertubuhan Cina, yang bimbang dengan pelaksanaan cadangan itu, supaya tidak mengaitkan dengan isu-isu lain seperti menyamakannya dengan proses penyerapan di Indonesia.

"Jika sentimen perkauman dan agama dikaitkan, maka isu ini menjadi bahaya," katanya.

Hishammuddin berkata berdasarkan kepada taklimat yang diberikan kepada kabinet oleh Menteri Pendidikan, Tan Sri Musa Mohamad, apa yang hendak dilaksanakan oleh kerajaan itu adalah untuk kebaikan generasi akan datang dalam menggunakan bahasa Inggeris untuk menimba ilmu.

"Ia bukannya soal identiti Cina atau Melayu, atau isu bahasa Melayu atau Cina, tetapi ia berkaitan realiti dalam dunia sekarang. Tanpa menguasai Inggeris, kita tidak dapat menerima maklumat yang ada di luar sana...itulah isunya," katanya.

-- BERNAMA  
AFY MFJ MAI